

Ornitološke zabilješke sa Pala

Ornithological Notes from Pale: In the course of bird watching conducted by the author over a longer period in the zone of juniper and spruce forests, 29 bird species were registered

Na području Pala, lokalitetu Velike šume, koji se nalazi 900 m nadmorske visine u zoni (brdske) smrekove/smrčeve šume [*Piceetum excelsae (abietis montanum)*] s progalama, zabilježio sam 29 vrsta ptica. Posmatranja su vršena u dužem vremenskom periodu, odnosno u periodima kada sam boravio u svojoj vikendici. Na gniježđenju su zabilježeni: bijela pastirica (*Motacilla alba*), siva žuna (*Picus canus*), veliki djetlić (*Dendrocopos major*), šojka (*Garrulus glandarius*), crnokapa grmuša (*Sylvia atricapilla*), gavran (*Corvus corax*), crvendač (*Erithacus rubecula*), kukmasta sjenica (*Parus cristatus*), jelova sjenica (*Parus ater*), velika sjenica (*Parus major*), dugorepa sjenica (*Aegithalos caudatus*), brgljez (*Sitta europaea*), kos (*Turdus merula*). Siva vrana (*Corvus corone cornix*) je zabilježena da gnijezdi na crnogorici, dok je jato od oko 15 primjeraka gradskog goluba (*Columba livia f. domestica*) registrovano u proljetnom aspektu u traženju pogodne zgrade za gniježđenje. Redovno je zabilježeno prisustvo svrake (*Pica pica*), zlatoglavog kraljića (*Regulus regulus*), rusog svračka (*Lanius collurio*), krstokljuna (*Loxia curvirostra*), seoske lastavice (*Hirundo rustica*), drozda imelaša (*Turdus viscivorus*), drozda cikelja (*Turdus philomelos*), zebe (*Fringilla coelebs*) i jastreba (*Accipiter gentilis*). Prvo kukanje kukavice (*Cuculus canorus*) u 2002. godini zabilježeno je 20. aprila, dok je posljednje zabilježeno 16. juna u ranim jutarnjim satima. Primijećeno je da se iz godine u godinu fenofaza javljanja kukavice mijenja zavisno od meteoroloških faktora. Lješnikara (*Nucifraga caryocatactes*) je primijećena samo u vrijeme zrenja lješnika. Vuga (*Oriolus oriolus*) je konstatovana rijetko u preletu, a češljugar (*Carduelis carduelis*) je zabilježen na preletu tokom ljeta. Rijetko je vidana i zimovka (*Pyrrhula pyrrhula*).

Dr. sc. Čedomil Šilić
Patriotske lige 22, 71000 Sarajevo